

# Eclesiastés

## *Nochi san tapic*

<sup>1</sup> Ya ni cati quijcuilo Tamachtijquet Salomón, icone David, cati elqui tanahuatijquet ipan altepet Jerusalén. <sup>2</sup> Na niquitztoc para nochí tamanti san tapic huan amo teno nelía huejcahua huan ipati para nochipa. Quej nopa niquijtohua na cati nitacamanalhuijquet.

<sup>3</sup> ¿Taya quitani se tacat ica nochí itequi cati ohui cati quichihua ipan ni taltipacti? <sup>4</sup> Nochi masehualme cati ama itztoque miquise huan sequinoc tacatise. Teipa injuanti nojquiya miquise. Pero ni taltipacti, quena, ya nopa nochipa mocahua. <sup>5</sup> Quisa tonati ica ijnaloc huan oncalaquí ica tiotac. Teipa nimantzi sempa pehua motalohua hasta ajsi campa quistehua para sempa quisas. <sup>6</sup> Nopa ajacat tailpitza ica tatzinta huan mocuepa huan tailpitza ica huejcapa huan sempa quichihua seyoc huelta nica huan neca. Amo cana ajsiti para nopona mocahuas. <sup>7</sup> Nochi hueyame mataloijiyahuij hasta nopa hueyi at, pero nopa hueyi at amo quema temi. Huan nopa at ipan hueyi at sempa tejco para huetzis huan ajsis ipan nopa hueyame campa hualajqui huan sempa matalohuaj para ajsitij ipan hueyi at. <sup>8</sup> Nojquiya san se ica masehualme. Nochi tamanti san techchihua tahuel ma tisiyahuica huan ma timocuesihuítica. Toixteyolhua amo quema siyahuij ica cati quinequij quiitase. Huan tonacashua amo

quema ixhuij ica cati quicaquij. Nochipa tachix-toque huan tacactoque para más tachiyase huan tacaquise.

<sup>9</sup> Nochi tamanti cati panoque achtohuiya, sempa panose teipa. Nochi cati ama pano, ya panotoc achtohuiya. Amo onca yon se tamanti cati yancuic ipan ni taltipacti. <sup>10</sup> ¿Taya tamanti hueli tiquijtose para yancuic? ¡Yon se! Nochi tamanti cati amantzi pano, nojquiya san se panotoc achtohuiya. <sup>11</sup> Amo aqui quinelnamiqui nopa tacame cati huejcajquiya itztoyaj huan taya panoc ipan ininemilis. Huan nojquiya nochi masehualme cati teipa tacajtiyase huan cati quichihuase nojquiya amo quielnamiquise nopa masehualme cati tacatise teipa quema inijuanti ya mictose.

### *Inemilis Salomón*

<sup>12</sup> Na cati nicamanalti nieltoya nitanahuati-jquet ipan tali Israel huan niitztoya ipan altepet Jerusalén. <sup>13</sup> Huan nimotemamacac para ica miyac talnamiquilisti nimomachtis huan nij-machilis nochi tamanti cati masehualme quichihuaj ipan ni taltipacti. Huan niquitac para nopa tequit cati Toteco quinmacatoc masehualme para ipan ma timotequihuica, nelohui. <sup>14</sup> Quena, cuali nijtachili nochi tamanti tequit cati quichihuaj masehualme ipan ni taltipacti huan niquitac para nochi eliyaya san tapic. San quihualica siyahuilisti huan tequipacholi pampa san tapic quej san tapic sinta se quinequi quiitzquis nopa ajacat cati tailpitztoc.

**15** Se tamanti cati huijcoltic amo hueli tijchihuas xitahuac. Huan se tamanti cati amo onca, amo huelis tijpohuas.

**16-17** Huajca nimoyolilhui: “Xiquita, nica niitztoc cati más nijpiya notalnamiquilis que nochí sequinoc nopa tanahuatiani cati tanahuatijque achtohuiya ipan altepet Jerusalén. Más nimochijtoc hueyi huan nochí nimomachtijtoc huan más nijmati que nochí sequinoc tacame. Nojquiya nijchijqui miyac tequit para nijmachilis huihuiyot huan cati san tapic. Huan masque nijchijtoc nochí ya ni, ¿taya ipati cati nijchijtoc?” Huan niquitac nochí cati nijchijtoya para san techsiyahuiltijtoya huan amo teno cati cuali quisqui ten nochí notequi. Elqui quej nimotalohuayaya para niquitzquisquía nopa ajacat cati tailpitza-yaya. **18** Pampa quema se masehuali más mochihua talnamiqui, más mohueyilía itequipachol. Huan quema se más quimati, más mohueyilía itacuajcualol.

## 2

### *San tapic nochí tamanti paquilisti*

**1** Ipan noyolo nimoilhui: “Nijyejyeco paquilisti sinta ya nopa cati ipati. Huajca nimoilhui nimopaquilismacas hasta niixhuis. Huelis ya nopa cati ipati ipan ni nemilsti.” Pero niquitac paquilisti nojquiya elqui san tapic. **2** Nelía se huihuiyot para tihuetcas nochí tonali pampa paquilisti amo teno mitzpalehuis. **3** Teipa nimoyolilhui miyac huan nimoilhui para nijyejyecos para nimopaquilismacas ica tailisti huan noja

nijtemos talnamiquilisti. Huan quema ya nopa njchihuayaya niquitac para nojquiya eliyaya se huihuiyot. Nimoilhuiyaya huelis ica xocomecat at cati cococ njpantisquía nopa tasehuilisti cati nochí masehualme quitemohuaj ipan ininemilis, pero amo.

<sup>4</sup> Teipa nimoilhui para njtemos paquilsti ica huejhueyi tequit cati njchihuasquía. Huan nimochijchihuili huejhueyi calme huan nojquiya niquintojqui xocomeca milme. <sup>5</sup> Huan niquintojqui cuamilme huan xochimilme, huan nopona niquintojqui nochí tamanti cuame cati temacaj intintajca. <sup>6</sup> Huan nojquiya niquinchijchijqui huejhueyi piletas para quicuis miyac at para nicatequis nopa miyaqui cuame cati niquintojqui. <sup>7</sup> Teipa niquincojqui taca tequipanohuani huan sihua tequipanohuani huan nojquiya miyac notequipanojcahua ipan nochaj quintacatiltijque coneme para elise noaxcahua. Nojquiya niquinpixqui tahuel miyac huacaxme huan borregojme hasta quipanoc inimiyaca cati quinpixtoyaj nochí sequinoc tanahuatiani cati tanahuatijque achtohui ten na ipan altepet Jerusalén. <sup>8</sup> Huan nijsentili miyac plata tomi huan oro tomi cati ica techtaxtahuiyayaj impuesto miyac tanahuatiani huan tequichihuani ten campa hueli talme. Nojquiya niquinpixqui miyac huicani huan tatzotzonani cati tacame huan sihuame. Huan nijpixqui nochí tamanti tepos tatzotzonali.

<sup>9</sup> Huajca nelía nimohueyichijqui ipan nochí tamanti hasta niitztoya más nihueyi que nochí nopa tanahuatiani cati achtohuiya tanahuatijque ipan altepet Jerusalén. Pero ipan nochí tamanti

cati nijchijqui noja ninemiyaya ica miyac talnamiquilisti. <sup>10</sup> Nimoaxcatiyaya nochi tamanti cati niquixtocayaya. Huan ten hueli tamanti cati elqui quentzi se paquilsti huan nijnequiyaya nijchihuas, huajca nijchijqui. Huan nijpanti paquilsti ipan notequi masque nelía elqui ohui. Nopa paquilsti cati nijseli ten notequi elqui notaxtahuil por nochi nopa miyac tequit cati nijchijqui. <sup>11</sup> Teipa nijtachili nochi nopa huejhueyi tamanti tequit cati nijchijtoya huan niquitac para nochi eliyaya san tapis huan san techsiyahuiltijtoya. Amo teno cati nijchijtoya ipan ni taltipacti nelía ipati huan huejcahuasquía.

<sup>12</sup> Huajca pejqui nijtajtachilía nopa talnamiquilisti huan nopa huihuiyot para nijmatis catijqui más ipati. Huan cati hueli tanahuatijquet cati hualas teipa amo teno huelis quichihuas cati yancuic, que cati ya eltoc. <sup>13</sup> Quena, quiijtos para nopa talnamiquilisti achi más ipati huan amo huihuiyot. San se quej nopa taahuili achi más cuali que nopa tzintayohuilot.

<sup>14</sup> Pampa se masehuali cati talnamiqui tachiya campa nejnemi. Pero nopa huihui tacat, yaya nejnemi quej elisquía campa tzintayohua. Pero nojquiya niquitac para onca se tamanti cati quinajsi nochí ome. <sup>15</sup> Quena, se huihui tacat miquis huan na nojquiya nimquis. Huajca ¿para ten nitequititoc nelchicahuac hasta ama para noja más nimochihuas nitalnamiqui? Huajca nimo-macac cuenta para nopa talnamiquilisti nojquiya amo nelía ipati. <sup>16</sup> Pampa se cati talnamiqui miquis huan se cati huihuitic nojquiya miquis.

Huan teipa ica miyac tonali ayecmo aqui quinel-namiquis.

**17** Yeca nelía niquijixqui ni nemilisti, pampa nochí tamanti tequit catí nijchijtoya ipan ni taltipacti san techsiyahuiltijtoya huan techtequipacholmacac. San taping notequi quej san taping sintá se quinequisquía quiitzquis nopa ajacat catí tailpitztoc. **18** Nojquiya niquijixqui nochí notequi catí nijchijtoya ipan ni taltipacti pampa teipa hualas seyoc huan yaya moaxcatis nochí catí nijpixtoc. **19** Huan ¿ajquiya huelis quimatis sintá elis talnamiqui o huihuitic? Pero masque mochihuas talnamiqui o huihuitic, yaya quiselis nochí catí nijtantoc ica nochí notequi catí nijchijtoc ica miyac talnamiquilisti ipan ni taltipacti. Huajca niquitac san taping nochí notequi.

**20** Huajca pejqui nimocuesohua ica nochí nopa huejhueyi tequit catí nijchijtoya. Pampa nelía tahuel nimosiyahuiltijtoya ica nochí nopa tamanti catí nijchijtoya ica miyac notalnamiquilis. **21** Pero masque ipan nochí nonemilis nijtemojtoc para nijchihuas notequi ica talnamiquilisti, taixmatilisti huan yajatili, teipa monequi nijcajtehuas imaco se catí amo mosiyahuiltijtoc yon quentzi ipan nopa tequit. Huajca ya nopa se tamanti catí amo cuali huan nelía se hueyi huihuiyot.

**22** Sinta quej nopa, huajca ¿taya quitani se tacat ten nochí itequi ipan ni taltipacti catí moisihuáltia quichihua huan ica catí mosiyahuiltía miyac?

**23** Pampa mojmosta ipan itequi quipano tacuajcualoli huan tequipacholi huan hasta tayohua

nojquiya amo cochi pampa moilhuía ten itequi.  
Pero nochí ya nopa san tapic eltoc.

<sup>24</sup> Huajca niquitac para amo onca teno más  
cuali huan ipati para se tacat, san ma quicua  
ten quinequi huan ma quii cati quipactía  
huan ma quichihua nopa tequit cati más  
quipaquilismaca pampa nopa paquilisti huala  
ten Toteco. <sup>25</sup> Huan sinta Toteco amo techmaca  
itapalehuil, ¿ajquiya huelisquía tacuas huan  
quipiyas paquilisti? <sup>26</sup> Sinta se masehuali  
quichihua cati quipactía Toteco, Toteco quimacas  
talnamiquilisti, taixmatilisti huan paquilisti.  
Pero ica se tajtacolchijquet Toteco quitequimacas  
para tequitis miyac huan moricojchihuas para  
quimactilis nopa ricojyot se cati quichihua cati  
quipactía Toteco. Nochi ya nopa nojquiya san  
tapic huan san quihualica tequipacholi. San  
tapic eltoc quej san tapic sinta se quinequisquía  
quiitzquis nopa ajacat cati tailpitztoc.

### 3

*Nochi tamanti quipiya quema ipohual para  
mochihuas*

<sup>1</sup> Toteco quitalijtoc se cuali tonali para sesen  
tamanti.

Nochi tamanti cati monequi tijchihuase quipiya  
tonali quema mochihua.

<sup>2</sup> Onca se tonali para titacatis huan onca se tonali  
para timiquis.

Onca tonali para titatojtocas huan onca tonali  
para tijhuihuitas cati tijtoctoc.

<sup>3</sup> Onca tonali para titamictis huan onca tonali para  
titepajtis.

- Onca tonali para titasosolos huan onca tonali para titacualchijchihuas.
- <sup>4</sup> Onca tonali para tichocas huan onca tonali para tihuetcas.
- Onca tonali para timocuesos huan onca tonali para timijtotis.
- <sup>5</sup> Onca tonali para tiquinsemanas teme huan onca tonali para tiquinsentilis.
- Onca tonali para tijcuanajnahuas se masehuali huan onca tonali para amo tijchihuas.
- <sup>6</sup> Onca tonali para tijtemos huan tijpantis tamanti huan onca tonali para tijpolos.
- Onca tonali para titaaajocuis huan onca tonali para tijtepehuas cati ticajoctoc.
- <sup>7</sup> Onca tonali para tijtzayanás se tenijqui huan onca tonali para tiquijtzomas cati tzayantoc.
- Onca tonali para timocamatzacuas huan onca tonali para ticamanaltis.
- <sup>8</sup> Onca tonali para titeicnelis huan onca tonali para titecualancaitas.
- Onca tonali para tatehuilisti huan onca tonali para tasehuilisti.
- <sup>9</sup> Huajca ¿taya quitani se tacat ten nochitiqui cati ohui cati ica mosiyahuiltia? <sup>10</sup> Na nimoilhuijtoc miyac ten nochit nopa miyac tamanti tequit cati Toteco quinmacatoc masehualme para ipan ma motequihuica. Huan ya ni cati niquita. <sup>11</sup> Toteco quichijtoc para sesen tamanti ma eli cuali huan ma mochihua ipan nopa tonali cati quinamiqui. Nojquiya quitalijtoc ipan iyolo sesen masehuali para ma quimati para amo quema miquis. Nojquiya quimati para nopa

tamanti cati nelía ipati ipan ni taltipacti huejcahuas para nochipa. Pero yon se masehuali amo yajati quimachilía nochí italnamiquilis huan itequi Toteco cati yaya quichijtihualajtoc ten ipejya huan nochí cati quichijtiyas hasta itamiya. <sup>12</sup> Huajca amo onca seyoc tamanti cati achi cuali para masehualme. San monequi paquise huan quichihuase cati cuali quema noja yoltoque. <sup>13</sup> Cuali para quipantise paquilsti ica cati quicuase huan cati quiise, huan ica nopa tequit cati quichihuase. Pampa ni paquilsti eltoc quej se nemacti cati Toteco techmacatoc.

<sup>14</sup> Nijmati para nochí cati quichihua Toteco, huejcahuas para nochipa. Ipan nochí cati quichijtoc amo teno hueli más tijhueyilise, yon amo teno hueli tijquixtilise. Toteco quichihua ya nopa para ma quihueyitepanitaca huan ma quiimac-sica nochí masehualme. <sup>15</sup> Nochi cati onca ama, ya oncac huejcajquiya. Huan nochí cati oncas teipa, nojquiya ya oncatoc. Toteco quichihua para sempa ma onca cati huejcajquiya oncac huan ixpolijqui.

*Tamanti cati amo xitahuac ipan ni nemilisti*

<sup>16</sup> Nojquiya huelqui niquitac ipan nochí taltipacti para onca ten fiero huan onca tajtacolot campa quinamiqui oncas cati xitahuac. Quena, jueces cati inintequi para tetajtolsencahuase xitahuac mocuapolojtoque huan quichihuaj cati fiero. <sup>17</sup> Huan nimoyolilhui: “Ipan nopa tonali cati Toteco quitalijtoc, yaya quintajtolsencahuas nochí masehualme masque cuajcualme huan amo cuajcualme.”

<sup>18</sup> Huan huajca niquitac para Toteco quincahuilía masehualme ma quitoquilica nopa fiero ojti cati quinequij para quinyejyecos. Quej nopa injuanti quiitase para ihuical ininpantis quej tapiyalme pampa nochí ome miquise. <sup>19</sup> Pampa nochí masehualme huan tapiyalme quijjotilanaj san se ajacat huan nochí ome miquij. Huajca tiquitaj para masehualme amo más huejhueyi que tapiyalme. Yon se amo huejcahuas. San tapic itztoque. <sup>20</sup> Nochi ome yahuij ipan san se lugar. Nochi ome hualajque ten taltepochi huan sempa mocuepase taltepochi. <sup>21</sup> Pampa ¿ajquiya hueli quinextilis ica temachili sinta itonal se masehuali yahui huejcapa huan itonal se tapiyali yahui tatzinta? <sup>22</sup> Huajca nijmachili para monequi se masehuali ma paqui ica itequi ipan ni taltipacti pampa ya nopa itaxtahuil. Amo onca seyoc tamanti cati achi cuali para quichihuas. Pampa quema yaya ya mictos, amo aqui huelis sempa quimacas nemilisti seyoc huelta para ma mopaquilismaca ica cati oncas teipa ten imiquilis. Yeca sesen tacat ma mopaquilismaca ama.

## 4

<sup>1</sup> Sempa niquitac nochí nopa taijyohuilsti, tequipacholi huan taohuijcayot cati onca ipan ni taltipacti. Niquinitac masehualme cati chocaj pampa sequinoc quintaijyohuiltíaj huan amo teno hueli quichihuaj para momanahuise. Amo aqui quinyoltalía, yon amo aqui quinpalehuía pampa cati quintaijyohuiltíaj quipiyaj miyac chicahualisti. <sup>2</sup> Huajca nijmachili para más cuali itztoque nopa masehualme cati ya mijque huan

amo aqui noja yoltoque. <sup>3</sup> Huan noja más cuali injuanti cati amo quema tacajtoque pampa amo quema quiitztoque nochí cati amo cuali cati onca ipan ni taltipacti.

<sup>4</sup> Huan niquitac quema se masehuali quichihua huejhueyi tequit huan nochí cati quichihua quisa cuali, teipa sequinoc masehualme pehuaj quicualancaitaj. Huajca nochí itequi quisa san tapic huan san quihualica tequipacholi.

<sup>5</sup> Masehualme cati huihuitique amo quinequij tequitise huan yeca itztoque ica mayanti. <sup>6</sup> Injuanti moilhuíaj para más cuali motatzcanequise huan amo tequitise. Amo quinequij tequitise pampa moilhuíaj nochí tequit quisas san tapic huan san quinsiyahuiltis.

### *Techpalehuíaj tohuampoyohua*

<sup>7</sup> Nojquiya niquitztoc seyoc tamanti cati san tapic ipan ni taltipacti. <sup>8</sup> Niquila se tacat cati itztoc iseltitzi. Amo quinpiya iconehua, yon iicnihua, pero mojmosta tequiti chicahuac pampa, masque miyac tomi quipiya, quinequi noja más moricojchihuas. Huan amo motatzintoquilía: “¿Ajquiya nijcahuilijtehuas noricojyo quema nimiquis? ¿Para ten tahuel nimosiyahuiltía huan amo nimopaquilismaca ica nochí cati nijpiya?” San tapic nochí cati quichihua nopa tacat huan tahuel ohui inemilis.

<sup>9</sup> Achi más cuali quema ome masehualme tequitij san sejco huan amo tequiti setzi iseltitzi. Más quitanise san sejco que quitanisquía sinta tequitisquía iyoca. <sup>10</sup> Sinta se huetzis, huajca ne se quitananas. Pero teicnelti nopa masehuali

cati itztoc iseltitzi. Pampa sinta huetzis, amo aqui quipiyas para quitananas. <sup>11</sup> Huan nojquiya quema taseseya, sinta ome motecase san sejco ica se taquemit, huajca momacase tatotonilot huan amo sesecuise. Pero se masehuali cati itztoc iseltitzi ¿quenicateza huelis mototonilis? <sup>12</sup> Huan quema se masehuali itztoc iselti, sequinoc huelis quitehuise huan quitanise. Pero sinta itztoque ome, huajca amo quintanise. Huan noja más cuali sinta itztoque eyi. Onca se camanali cati quiijtohua para se lazo cati quixinepalojtoque ica eyi pilazojtzitzi, amo nimantzi cotonis.

*Más ipati talnamiquilisti huan amo tomi*

<sup>13</sup> Más cuali se telpocat cati teicneltzi huan talnamiqui que se rico tanahuatijquet cati huehuentzi huan huihuitic, huan ayecmo quinequi quicaquis consejos. <sup>14</sup> Se telpocat cati talnamiqui huelis quisas ten se tatzacti huan quipantis se nemilisti cati nelcuali. Huelis elis tanahuatijquet masque tacatqui nelteicneltzi ipan nopa tali. <sup>15</sup> Huan miyac masehualme ipan ni taltipacti quipiyasquíaj paquilisti para quipalehuise se telpocat quej nopa, hasta quipalehuisquíaj mochihuas tanahuatijquet. <sup>16</sup> Se telpocat cati quej nopa talnamiqui huelis quinyacanas tahuel miyac masehualme, huan nochí quiicnelise. Pero teipa quema tacajtiyase sequinoc masehualme, injuanti quihuejcamajcahuase. Yeca cati quichihuasquíia elisquíia san tapic quej san tapic para se cati quinequisquíia quiitzquis nopa ajacat cati tailpitztoc.

## 5

*Xijtamichihua cati tijtencahuilía Toteco para tjchihuas*

<sup>1</sup> Quema tiya ipan ichaj Toteco, cuali xitacaqui huan amo nimantzi xicamanalti. Amo xijmaca nopa tacajcahualisti cati huihui tacame quimacaj. Pampa huihui tacame nimantzi quitencahuilíaj Toteco para quichihuase miyac tamanti masque amo quema quichihuase. Yon amo moilhuíaj sinta elqui se tajtacoli cati quijtojque.

<sup>2</sup> Huajca amo xicamanalti nimantzi, yon amo nimantzi xijtencahuili Toteco para tjchihuas se tenijqui. Pampa Toteco itztoc nepa ilhuicac huan ta tiitztoc ipan ni taltipacti. Huajca amo xicamanalti miyac iixpa.

<sup>3</sup> Quema se tahuel motequihuía ica miyac tamanti tequit, pehua quipiya temicti. Nojquiya se tacat cati quipactía camanaltis miyac, teipa mocuepas se huihui tacat.

<sup>4</sup> Huajca quema tijtencahuilía Toteco cati tjchihuas, nimantzi xijchihua cati tiquilhuijtoc. Pampa Toteco amo quincualita cati huihuitique. Monequi xijchihua nochí cati tijtencajtoc para tjchihuas. <sup>5</sup> Más cuali para amo quema tijtencahuas para tjchihuas se tenijqui que para tijtencahuas huan amo tjchihuas.

<sup>6</sup> Quema tijtencahua se tamanti huan amo tjchihua, nelia elqui mocamac cati mitzchihualti titajtacolchihuas. Nojquiya amo xiquilhui itayolmelajca Toteco cati tequiti nopona ipan tiopamit

para timocuapolo quema tijtencahuili cati tijchihuasquía. Sinta quej nopa tiquijtos, tijcualancamacas Toteco huan yaya hueli quitamisosolos nochí cati tijchijtac.

<sup>7</sup> Sinta se quitemiqui miyac tamanti cati quinequi quichihuas pero amo teno quichihua, san huihuitic. Sinta camanalti miyac huan amo teno quichihua, san tapic. Más cuali xijtepanitaca huan xiquimacasica Toteco.

### *Cati amo ipati ipan tonemilis*

<sup>8</sup> Sinta ipan se estado ipan ni tali tiquitas para se rico quitaijyohuiltía se cati teicneltzi huan amo quichihuilá cati xitahuac, amo teno ximoilhui. Sesen tequitquet quipiya seyoc cati quinahuatía, huan cati quinahuatía ya nojquiya quipiya seyoc cati quitachilía. Huan itztoc seyoc más huejcapa ten nopa ome huan teipa itztoc nopa hueyi tanahuatijquet. Huan pampa nochí moixmatij, tahuel ohui para quixitahuase cati tetaijyohuiltía. <sup>9</sup> Nopa tali huan cati quieliltía pano ipan inimax nochí cati quipiyaj tanahuatili. Hasta nopa tanahuatijquet quiselía cati temaca nopa tali masque nelía amo xitahuac quej quichihuaj.

<sup>10</sup> Pero masque se tacat tahuel quinequi quipiyas tomi, amo quema quipiyas hasta ayecmo quinequis. Huan cati quinequi elis rico, amo quema moilhuía para ya quipiyaj miyac ricojyot.

<sup>11</sup> Pampa quema se masehuali quimiyaqwilá itomi, nojquiya momiyaqwilíaj cati quitequihiúaj huan quitamiltíaj. Huajca ¿taya mitzpalehuis nopa ricojyot sinta san talochtamis moixpa?

**12** Se tacat cati tequiti chicahuac, cochi cuali masque quipiya miyac itacualis o pilquentzi. Pero se tacat cati rico tahuel mocuesohua huan amo cochi pampa quiimacasi quipolos nochí cati quipiya.

**13** Seyoc tamanti cati nojquiya san tapic cati niquitztoc ipan ni taltipacti eltoc para se masehuali quiajocuis itomi huan teipa quitequihuis ipan tamanti cati amo cuali para ya. **14** Nojquiya hueli quitalis itomi ipan tamanti cati amo quisa cuali huan quitamis itomi. Quej nopa amo teno mocahuas para quiselise iconehua teipa. **15** Sesen masehuali tacati xolot huan quej nopa sempa mocuepas quema miquis. Amo aqui huelis quihuicas yon se tamanti cati ica mosiyahuiltijtoc nica.

**16** Ya nopa nelía se hueyi tequipacholi pampa san tapic itequi se masehuali. Quistehuas ten ipan ni taltipacti san se quej ajisco. Nochi itequi san quihuicac ajacat. **17** Huan nochí tonali ipan inemilis, eltoc quej yaya nemí ipan tzintayohuilot huan miyac tamanti quitzacuilia. Mocuesohua huan taijyohuía miyac.

**18** San ni tamanti cati cuali para se masehuali. Monequi ma tacua cuali, huan ma quii se xocomecat at cati ajhuiyac huan ma mopaquilismaca ipan itequi nochí tonali cati Toteco quimaca para ma itzto. **19** Huan nelía cuali sinta se tacat quiselijtoc ten Toteco ricojyot huan chicahualisti. Huan sinta quej nopa Toteco quimacatoc, ma mopaquilismaca ica cati quiselijtoc. Sinta se masehuali paqui ipan itequi huan ica nopa tamanti cati quipantía ipan inemilis, huajca nelía cuali. Ipaquilis cati

quipiya eltoc quej se nemacti ten Toteco. <sup>20</sup> Se masehuali cati quej nopa paqui ipan inemilis, amo mocuesohua por cati panotoc ipan inemilis, pampa Toteco quitemitía iyolo ica paquilisti.

## 6

<sup>1</sup> Onca seyoc tamanti cati amo cuali cati na niq-uitztoipan nochitaltipacti. <sup>2</sup> Toteco quinmacatoc sequij masehualme huejhueyi ricojyot huan tatepanitacayot cati quinpalehuisquía quipiyase nochicati inijuanti quinequij, pero amo quinmacatoc chicahualisti para itztose para quitequihuise cuali. Miquij nimantzi huan nochicati quipiyaj moaxcatise sequinoc. Ya nopa nelía sanitapic huan amo cuali.

<sup>3</sup> Masque se tacat quinpiyas 100 itelpocahua huan miyac iichpocahua huan huejcahuas itztos hasta elis huehuentzi, sintamo quipantíapaquilisti ipan inemilis huan quema miquis amo quicajtehuas se quentzi tomi para ica quitalpachose, na niquipijtohua para nopa tacat más cuali tacajtosquía mictoc. <sup>4</sup> Sinta tacajtosquía mictoc huan amo quiitztosquía tatanexti, amo quipiyasquía yon itoca. <sup>5</sup> Amo quiitztosquía tonati, yon amo teno quimajtosquía sintona se tonati. Pero ya nopa noja más cuali huan amo tielis se huehuentzi cati amo quema quimatqui paquilisti. <sup>6</sup> Huan masque nopa tacat itztosquía ome mil xihuit, sintamo quipantíapaquilisti, huajca san tapic para itztoc. Yaya san miquis quej miquise nochisequinoc.

<sup>7</sup> Nochi tacame ipan taltipacti tahuel mosiyahuiltíaj ipan inintequi para quitanise ten

quicuase, pero masque ya nopa, amo quema ixhuij ica cati quinequij quichihuase. <sup>8</sup> Sinta timoilhuía ten ya nopa, masque se talnamijca tacat huan se cati huihuitic quipanoj san se tamanti, más cuali inemilis yaya cati talnamiqui, pampa yaya más tamachilía. Amo nimantzi quichihua ten hueli tamanti cati quinequi quichihuas. Huan masque se itztoc teicneltzi, más cuali eltoc sinta yaya talnamiqui.

<sup>9</sup> Ximopaquilismaca ica cati tijpiya. Amo xi-jnequi tamanti cati amo quinamiqui para tijpiyas. Para tijnequis tamanti cati amo hueli tijpiyas eli san tapic quej tijnequisquía tiqutzquis ajacat cati tailpitztoc.

### *Amo tijmatij taya hualas teipa*

<sup>10</sup> Nochi cati ama pano eltoc pampa huej-cajquiya quej nopa quisencajqui Toteco para ma pano. Huan hasta huejcajquiya Toteco ipa quimatiyaya taya quichihuasquía sesen tacat. Yeca san tapic para timonajnanquilis ihuaya Toteco, pampa yaya más hueyi que ta.

<sup>11</sup> Sinta se tacat camanalti miyac, nel quentzi ipati cati quijtohua. Huajca, amo más xihuejchihua.

<sup>12</sup> Tonemilis eltoc quej se ecahuili cati amo huejcahua huan cati amo teno ipati. Amo aqui huelis techilhuis quenicatza ma tiitztoca ica yejyectzi ipan nopa tonali cati tijpiyaj nica. Huan amo aqui huelis techilhuis taya panos teipa nica ipan ni taltipacti quema ya tiixpolijtose.

## 7

*Talnamiquilisti huan huihuiyot*

<sup>1</sup> Más ipati sintu nochu mitzixmatij para se ticualli masehuali huan amo para tijhuicas nopa taajhuiyacayot cati más patiyo. Más ipati nopa tonali quema timiquise huan amo nopa tonali quema titacatque.

<sup>2</sup> Más ipati para tiyas campa mijqui se masehuali huan amo para tiyas campa ilhuichihuaj. Pampa ta nojquiya mitzchiya miquilisti huan cuali para timoyolilhuis ten momiquilis nochu tonali cati noja polihui ipan monemilis.

<sup>3</sup> Más cuali tijpiyas taohuijcayot huan amo huetzquisti pampa nopa taohuijcayot mitzpalehuis para tielis titatzejzelotic.

<sup>4</sup> Se cati talnamiqui monejnehuilía miyac ten miquilisti cati quinajsi nochu masehualme. Pero se cati huihuitic san monejnehuilía quenicatza mopaquilmamacas ama.

<sup>5</sup> Más cuali para tijcaquis quema se cati talnamiqui mitztacahualtía huan amo quema se cati huihuitic mitzyejyectalis ica icamanal. <sup>6</sup> Pampa quej nimantzi tamis huitzti ipan tit, quej nopa nimantzi tamis nopa yejyectzi camanali cati mitzhuijtoc nopa huihui tacat. Huan amo teno mitzpalehuis.

<sup>7</sup> Talnamijca tacame cati quiselíaj se taxtahuili para quichihuase cati amo xitahuac mocuepase huihui tacame. Quena, nopa taxtahuili quinsosolhuilis inintalnamiqilis.

**8** Más yejyectzi quema tijtamiltis se tequit huan amo quema tijpehualtis. Más cuali tijpiyas hueyi moyolo huan amo timohueyimatis.

**9** Amo xicualani nimantzi, pampa ya nopa cati quichihuaj huihui tacame.

**10** Amo quema xiquijto: ¿para ten nopa tonali cati huejcajquiya panoque elque más cuali que ama? Amo tijmati sinta nopa tonali elque más cuali huan sinta titalnamiqui amo ya nopa tiquijtos.

**11** Sinta titalnamiqui, nelía cuali quej nojquiya cuali para tijselis tomi quema miquij motatahua. Quena, talnamiquilisti huan tomi mitzpalehuis miyac ipan ni taltipacti. **12** Talnamiquilisti nelía tepalehuía ipan miyac tamanti san se quej tomi. Pero nopa talnamiquilisti noja más tepalehuía pampa se cati talnamiqui huelis quimanahuis inemilis.

**13** Ximomaca cuenta quenicatza Toteco tequiti huan ximohuica cuali ihuaya. Pampa sinta Toteco quichihua huijcoltic moojhui, amo aqui hueli quichihuas xitahuac.

**14** Xipaqui nochipa quema tihueli. Xipaqui ipan nopa tonali quema nochí eltoc cuali. Huan quema ajsi nopa tonali cati fiero, ximomaca cuenta para nochí ome tamanti tonali, huala ten Toteco. Huan quej nopa nochí masehualme momacase cuenta para amo tojuanti cati titanahuatíaj quenicatza elis tonemilis.

### *Amo tijmachilíaj nochí tamanti*

**15** Ipan ni nonemilis cati amo ipati, niquitztoc miyac tamanti. Niquitztoc para sequij masehualme cati quichihuaj cati xitahuac iixpa Toteco

miquij quema noja telpocame. Huan sequij masehualme cati fiero ininemilis huejcahuaj itztoque.

**16** Huajca amo ximochihua neltahuel tixitahuac, yon neltahuel titalnamiqui. ¿Para ten tijnequi timotzontamiltis? **17** Nojquiya amo ximochihua tahuel tifero. Huan amo ximochihua tihuihuitic. ¿Para ten monequi timquis quema noja ayemo ajsi tonali? **18** Xijchihua san nopa tequit cati mitztocarohua tijchihuas huan amo xiquisa ipan ni lado, yon ipan ne se lado. Sinta tijchihuas ya nopa huan tiquimacasis Toteco, yaya mitztiochihuas huan nochí cati tijchihuas, quisas cuali.

**19** Se talnamijca tacat quihiya más chicahualisti que majtacti tequichihuani ipan se altepet.

**20** Huan ipan nochí ni taltipacti amo onca yon se tacat cati nochipa quichihua cati cuali huan amo quema tajtacolchihua.

**21** Nojquiya amo xijchihuili cuenta nochí camanali cati masehualme quijito. Pampa huelis tijcaquis motequipanojca mitzejelnamiqui. **22** Huan cuali tijmati para ta nojquiya miyac huelta tiquinejelnamictoc sequinoc mohuampoyohua.

### *Xijtemo talnamiquilisti*

**23** Nochipa nijchijtoc campeca hasta campa ni-hueltoc para nielis nitalnamiqui. Niquijto: “Na nijnequi nielis nitalnamiqui”, pero san tapic. **24** Nelía huejca huan ohui para tijpantis talnamiquilisti. **25** Nijtemo campa hueli para nijpantis nopa talnamiquilisti huan para nijmachilis

para ten onca nochí tamanti. Nijnequiyaya ni-jnextis para nelía huihuitic cati tajtacolchihua. Huan locojtic cati mohuihuichihua.

<sup>26</sup> Huan nijpanti para más chichic que miquilisti itztoc se sihuat cati ahuilnemi. Yaya itztoc quej se lazo cati teilpía huan quej se matat cati temasiltía. Aquí quichihua cati quipactía Toteco momanahuis imaco nopa sihuat. Pero tajtacolchi-huani mocahuaj ilpitoque ipan imata.

<sup>27</sup> NiTamachtijquet niquijtohua: “San ya ni ni-jpanti quema nijtemojtinentoc huan nitatzinto-catinentoc campa hueli para niquixmatis para ten onca sesen tamanti cati onca. <sup>28</sup> Masque ayemo nijpantía cati nijtemohuayaya, ya ni nijpantijtoc. Ipan se mil tacame itztoc san setzi cati talnamiqui, pero ten nochí sihuame campa hueli, yon se cati talnamiqui amo nijpantijtoc. <sup>29</sup> Huan ya ni cati nijpantijtoc. Nochi masehualme Toteco quinchichijqui xitahuaque, pero sese masehuali quitape-jpenijtoc quitoquilis se ojti cati amo cuali huan cati yahui tatzinta.”

## 8

<sup>1</sup> ¡Nelía yejyectzi tielis titalnamiqui! Cati talnamiqui huelis quintajtachilis tamanti huan quinmachilis. Huelis quinixtomas tamanti cati ohui para quimachilise sequinoc. Nopa talnamiquilisti quichihua para se tacat ma paqui huan ma moyolyamanili.

### *Xijneltoca nopa tanahuatijquet*

<sup>2</sup> Xijtepanita itanahuatil nopa tanahuatijquet pampa quej nopa tijtestigojquetzto ica Toteco

para tijchihuas. <sup>3</sup> Amo ximoisihuilti para tiquisas ten iixpa nopa tanahuatijquet. Yon quentzi amo xijpalehui se tamanti cati amo cuali cati sequij quinequij quichihuase, pampa nopa tanahuatijquet quintatzacuiltis cati amo quitepanitaj.

<sup>4</sup> Nopa tanahuatijquet quipiya chicahualisti para tefuerzajhuis para quineltocase itanahuatil. Amo aqui hueli quinajnanquilis o quiilhuis: “¿Para ten tijchihua?”

<sup>5</sup> Aqui quichihuas cati quijtohua itanahuatil nopa tanahuatijquet, amo quiselis tatzacuiltili. Huan se cati talnamiqui quimati quenicatza huan quema hueli quitamichihuas nochi cati yaya tanahuatía. <sup>6</sup> Quena, sesen masehuali hueli quipantis quema huan quenicatza monequi quichihuas sesen tamanti masque itztoc ipan huejhueyi taohuijcayot.

<sup>7</sup> Pero amo aqui quimati taya panos teipa. Yon amo aqui huelis quiyolmelahuas se masehuali taya ipantis.

### *Amo aqui momanahuis ica miquilisti*

<sup>8</sup> Yon se masehuali amo quipiya chicahualisti para quitzacuilis itonal para ma amo quisa ipan itacayo quema ya eltoc para miquis. Yon amo aqui quipiya chicahualisti para quitzacuilis miquilisti para amo quiajsis. Amo onca yon se tamanti cati huelis tijtequihuis para tijtzacuilis miquilisti. Huan ipan nopa tonali quema amo cuajcualme itztoquejya para miquise, yon se ten nopa tamanti amo cuali cati quichijtoque huelis quinpalehuis.

<sup>9</sup> Nochi ya ni cati niquitztoc quema nimotemamac para nimoyolilhuis miyac ten nochí

tamanti cati pano ipan ni taltipacti. Niquita para masehualme tahuel quipiyaj chicahualisti para mochihuilise cati amo cuali se ica seyoc.

*Tamanti cuali huan amo cuali*

<sup>10</sup> Niquitztoc para quema miqui se masehuali cati tahuel fiero inemilis huan cati mocajtoc huejca ten campa tatzejtzeloltic, nimantzi ayecmo moilhuíaj masehualme ten cati fiero quichijqui. Ipan nopa altepet campa quichijqui ten fiero quitalpachohuaj ica tatepanitacayot huan mocuepaj ininchaj huan quielcahuaj nochi cati fiero quichijqui. ¡Ya nopa nelía se hueyi huihuiyot!

<sup>11</sup> Quema se tacat quichihua cati amo cuali huan amo nimantzi quiselía se tatzacuitilisti, sequinoc moilhuíaj para amo teno ininpantis sintia nojquiya quichihuase fiero tamanti.

<sup>12</sup> Pero masque se masehuali tajtacolchihuas 100 huelta huan noja huejahuas para itztos miyac xihuit ipan ni taltipacti, na nijmati para nochi yas más cuali para masehualme cati qui-imacasij Toteco. <sup>13</sup> Amo nelía quisas cuali para tajtacolchihuani pampa amo quipiyase ininemilis cati cuali huan cati huejahuas. Ininemilis elis quej se ecahuili, pampa amo quitepanitaj huan quiimacasij Toteco.

<sup>14</sup> Onca sequinoc tamanti cati pano ipan ni taltipacti cati amo nelía xitahuac. Quemantica masehualme cati xitahuaque quipantíaj cati amo cuali quej elisquía tajtacolchihuani. Huan sequij tajtacolchihuani quipantíaj tamanti cati cuali quej

elisquía xitahuaque. Ya ni nojquiya se hueyi tamanti cati amo cuali.

<sup>15</sup> Huajca nijtapejpeni nijtequihuis nonemilis para nimopaquilismacas pampa nimoilhui para ipan ni taltipacti, amo onca seyoc tamanti cati más cuali para nijchihuas. San nitacuas, nitaís huan nipaquís. San paquilisti mocahuas ten nochí nopa tequit cati ohui cati Toteco techmacatoc ma tijchihuaca ipan ni taltipacti.

<sup>16</sup> Quema senquisa nijtemohuayaya talnamiquilisti, niquitac nochí tamanti cati panoyaya ipan ni taltipacti. Huan niquitac para mojmosta campa hueli onca tahuel miyac tequit cati mochihua tayohua huan tonaya huan amo motilquetza. <sup>17</sup> Huan nimomamacac cuenta yon se masehuali, masque talnamiqui, amo hueli quimachilía nochí cati Toteco quichihua, yon nochí cati mochihua ipan ni taltipacti. Huan sinta se quijtohua quimachilía nochí, amo melahuac icamanal. San Toteco hueli quiita nochí tamanti huan quimati nochí cati onca.

## 9

### *Nemilisti huan miquilisti*

<sup>1</sup> Nimoyolihuijtoc ten nochí ni tamanti huan nijmati para nochí masehualme cati xitahuaque huan talnamiquini huan nochí tamanti cati quichihuaj eltoc imaco Toteco. Amo aqui quimati ajquiya quiicnelise, yon ajquiya quicualancaitase pampa amo aqui quimati taya hualas teipa.  
<sup>2</sup> San se tamanti ininpanti nochí masehualme pampa nochí miquise. San se ipanti cati xitahuac huan cati amo xitahuac, cati cuali inemilis

huan cati amo cuali inemilis, cati tapajpactic huan cati amo tapajpactic iixpa Toteco, cati temaca tacajcahualisti huan cati amo temaca, cati tatepanita huan cati tajtacolchihua, cati tatestigojquetza huan cati amo tatestigojquetza. ¡Nochi miquise!

<sup>3</sup> Nesi para amo xitahuac para san se miquise nochí masehualme cati itztoque ipan ni taltipacti. Yeca sequij masehualme senquisa quichihuaj tamanti cati amo cuali. San quitapejpeníaj nopa ojti cati más fiero pampa moilhuiáj para san miquilisti quinchiya. <sup>4</sup> San cati yoltoque noja hueli mochiyase para quiselise tamanti cati cuali. Huajca quiijtohuaj: “Más cuali se chichi cati yoltoc huan amo se león cati mictoc.”

<sup>5</sup> Cati yoltoque quimatiј para se tonali miquise. Pero cati mictoque ayecmo teno quimatiј. Nojquiya amo quichiyaj para quiselise se taxtahuili teipa. Huan ayecmo cati quinelnamiqui. <sup>6</sup> Nochi cati quichijque nica ipan taltipacti, sintia teicneli-jque, tecualancaitaque, quitasomatque se tenijqui o quiixtocaque se tamanti, nochí ya nopa ya tanqui. Ayecmo quipiyaj ininparte ipan yon se tamanti cati pano ipan ni taltipacti.

<sup>7</sup> Huajca xiya xitacuati huan xiquiti moxocomeca at ica paquilisti ipan moyolo pampa Toteco quiita ni para cuali. <sup>8</sup> Nochipa ximoquenti yoyomit cati cuali huan ximotalili se quentzi taa-jhuiyacayot ipan motzon-teco.

<sup>9</sup> Xipaqui ihuaya nopa sihuat cati tiquicnelía. Quena, ipan ni nemilisti ipan ni taltipacti cati amo teno ipati, xipaqui pampa noja tiyoltoc sesen tonali cati Toteco mitzcahuilijtoc xiitzto. Pampa

nopa mosihua cati Toteco mitzmacatoc ya nopa nopa taxtahuili cati más cuali por noch i nopa ohui tequit cati tijchijtoc ipan ni taltipacti. <sup>10</sup> Nochi tamanti cati ajsi momaco para tijchihuas, xijchihua ica noch i nopa chicahualisti cati tijpiyi. Pampa ipan nopa mijcaostot campa nechcatitoc para tiyas, ayecmo huelis tijchihuas yon se tequit, ayecmo huelis timoyolilhuis quenicatz a tijchihuas se tamanti cati cuali. Ayecmo teno tiquixmatis, yon ayecmo tijpiyas talnamiquilisti.

### *Tamanti nica cati amo xitahuac*

<sup>11</sup> Nojquiya niquitztoc ipan noch i taltipacti para amo nochipa tatani yaya cati matalohua chicahuac. Huan ipan tatehuilisti amo nochipa tatani yaya cati más quipiyaj fuerza. Cati nelia talnamiquini amo nochipa quipiyaj ten quicuase. Cati miyac inintalnamiquilis amo nochipa quipiyaj miyac tomi. Ten hueli talojtzi ten hueli tamanti amo cuali hueli quipantis cati hueli masehuali quema amo quichiya.

<sup>12</sup> Yon se masehuali amo quimati quema ajsis tonali para taijyohuis. Quej se michi cati majsi ipan matat o quej se totot cati mocahua ilpitoc ipan se lazo, ten hueli talojtzi, hueli techajsis cati amo cuali.

### *Talnamiquilisti huan huihuiyot*

<sup>13</sup> Nojquiya niquitztoc seyoc tamanti cati pano ipan ni taltipacti. <sup>14</sup> Oncayaya se pilaltepetzi campa amo itztoya miyac masehualme. Huan ajsico se hueyi tanahuatijquet huan quiyahualo

huan pejqui quitehuía. <sup>15</sup> Pero ipan nopa pilaltepetzi itztoya se tacat teicneltzi cati nelía talnamiqui, huan yaya quimatqui taya quichihuas para quimanahuis nopa altepet. Huan quena, ica italnamiquilis quimanahui nopa pilaltepetzi. Pero teipa ayecmo aqui quielnamijqui nopa teicneltzi.

<sup>16</sup> Huajca niquijto: “Masque talnamiquilisti más ipati que chicahualisti, sinta cati talnamiqui itztoc nel teicneltzi, amo huejcahuas quitacaquilise icamanal. Huan teipa nochí quicúalancaitase.”

<sup>17</sup> Pero más cuali tijtacaquilise icualcamanal nopa tacat cati talnamiqui huan amo tijtacaquilise quema camanalti inintanahuatijca huihui tacame. <sup>18</sup> Más cuali se quipiyas talnamiquilisti que tepesti cati ica tatehuis. Pero se fiero masehuali hueli quisosolos miyac tamanti cati cuali.

## 10

### *Talnamiquilisti tehualiquilía cati ipati*

<sup>1</sup> Miyac sayolime cati mictoque huan lochon-toque mijyotía tahuel fiero hasta hueli quinenpolos iajhuiyaca se cuali taajhuiyacayot. Ica masehualme nojquiya. Sinta se talnamijca masehuali mocuapolos huan quichihuas se piltaixpanoltzi, sequinoc quiitase para nopa piltamantzi quitamixpolos nochí nopa cuali tamanti cati quichijtoya ica miyac italnamiquilis huan ica miyac tatepanitacayot.

<sup>2</sup> Iyolo se talnamijca tacat quichihualtía ma quichihua cati cuali. Pero iyolo se huihui tacat quichihualtía ma quichihua tamanti cati amo

cuali. <sup>3</sup> Quema se huihui tacat san nejnemi ipan se ojti quinnextilía sequinoc para quipolohua ital-namiquilis. Quena, masehualme quiitaj quen-icatza nemí huan nimantzi quiixmatij para hui-huitic. <sup>4</sup> Sinta moteco cualanis mohuaya, amo xijahua motequi. San ximoicnonequi huan xi-momaxojtili. Ya nopa mitzpalehuis para tijsehuis icualancayo moteco huan para amo tiquixpanos.

<sup>5</sup> Niquitztoc seyoc tamanti cati amo cuali cati pano ipan ni taltipacti; se tamanti cati pano ica tanahuatiani. <sup>6</sup> Fiero eltoc sinta se tanahuatijquet quincahuilis ma tanahuatica tacame cati huihuitique huan quintalis tacame cati ya quinextijtoque inintalnamiquilis ipan se tequit cati amo aqui quitepanita. <sup>7</sup> Nojquiya niquinitztoc tequipanohuani cati yahuij cahuayojtipa huan inintayacancahua nejnemij iniicxipa quej elisquía tequipanohuani.

<sup>8</sup> Talnamiquini quimatiij onca tamanti mahuilili huan tequitij ica miyac cuidado. Cati quixahuas se ostot para ameli, huelis iseltitzi huetzis nopona. Cati quisosolos se tepamit, huelis nopona quipantis se cohuat cati quitzacanis. <sup>9</sup> Aqui quiqxintia tet ipan tepexit para quitejtequis, huelis quihuelonis teme cati ica motepachos. Huan cati quitapana cuahuit, huelis mococos iseltitzi ica nopa hacha o ica nopa cuahuit. Huajca cati talnamiqui tequiti ica cuidado.

<sup>10</sup> Sinta nopa hacha ayecmo tatequi huan se masehuali amo quitentis, monequi más chicahuac tatzontequis para quitapanas cuahuit. Huajca cati nelía talnamiqui quitentia ihacha para quisas cuali itequi.

**11** Amo ipati para tijtemos se tamaxojtilijquet para quimaxojtilis se cohuat sintia ya mitztzacanijtoc.

**12** Se talnamijca tacat camanalti ica yejyectzi pampa hueyi iyolo ica sequinoc. Pero icamanal se huihui tacat quichihua ma motaicancahua ica iseltitzi.

**13** Quema pehua camanalti se huihui tacat quijjtohua cati moilhuía huan ya nopa huihuitic. Pero quema ontami ica noch tamanti cati moyolilhuijtoc, itztoc quej se loco tacat huan teilhuía noch cati amo cuali cati quinequi quichihuas.

**14** Se huihui tacat camanalti miyac quej elisquía quimati noch cati panos teipa huan quinequi tepohuilis noch. Pero amo aqui. Amo aqui quimati taya panos teipa.

**15** Quema se huihui tacat tequiti, mosiyahuiltia hasta ayecmo quimati quenicatza ajsiti ichaj.

**16** Fiero elis para nopa tali cati quipiya quej itanahuati jca se cati ayemo mortalnamictijtoc. Teicnelti nopa tali sintia itayacancahua pehuaj moi-huintíaj hasta quema tanesi. **17** Pero se paquillisti para nopa tali cati quipiya se cuali tacat quej itanahuati jca, huan quinpiya itayacancahua cati san quicuaj cati monequi para huelise tequitise chicahuac. Amo tahuel tacuaj huan moi-huintíaj.

**18** Se tacat cati tatzihui amo quitatamanía ichaj campa pano at, huan yeca palani apecchme. Teipa postequi nopa apecchme huan huetzi ichaj.

**19** Para mopaquilismacase masehualme quichihuaj se ilhuit. Huan nopona xocomeca at temaca paquillisti. Pero monequi tomi para noch cati mochihua.

<sup>20</sup> Yon ixtacatzi ipan moyolo, amo quema xit telchihua se tanahuatijquet o se rico, pampa huelis se totot quicaquis huan quipohuiliti.

## 11

### *Xitemajmaca miyac*

<sup>1</sup> Xitemajmaca miyac pampa teipa, ica miyac tonali, sempa ajsiqui momaco. <sup>2</sup> Xiquinmajmaca cati tijpiya miyac masehualme, pampa amo tijmati taya hualas mosta huan sinta ta nojquiya tijtemos ten mitzmonequilía.

<sup>3</sup> Quema nopa mixti quihualica miyac at, nopa at huetzi quema quinequi ipan tali. Huan sinta se cuahuit huetzis, campa quinequis huetzis masque ica huejcapa o ica tatzinta, nopona mocahuas.

<sup>4</sup> Sinta tijchiyas ma mijcueni nochí ajacat huan ma ayecmo huetzi at para tijchihuas se tequit, huelis amo quema tijchihuas.

<sup>5</sup> Quej se masehuali amo quimati canque huala nopa ajacat huan amo quimati quenicitza moscaltía se pilconetzi ipan iiji inana, quej nopa nojquiya se masehuali amo hueli quimatis quenicitza tequiti Toteco, yaya cati quichihua nochí tamanti.

<sup>6</sup> Xisenhuiquili xijtoca moxinach ica ijnaloc huan nojquiya xijtoca ica tiotac. Pampa amo tijmati catijqui xinachti ixhuas huan quisas más cuali. Huelis más ixhuas cati tijtojqui ica ijnaloc, o huelis cati tijtojqui ica tiotac o huelis nochí ome san se quipiyase inintajca cati cuali.

### *Xiquelnamiqui Toteco ama*

<sup>7</sup> Tahuel yejyectzi taahuili. Nelía cuali para tiitztos huan tiquitas tonati. <sup>8</sup> Masque se masehuali itztos miyac xihuit ipan ni taltipacti, sesen tonali ma quipiya paquilisti. Huan nojquiya ma quielnamiqui para teipa hualas tonali ten tzintayohuilot quema ya mictos. Pampa noch tamanti cati hualas elis san tacic.

### *Camanali para telpocame*

<sup>9</sup> Huajca ta cati titelpocat, ximopaquilmaca amantzi quema noja titelpoca tacat. Xiyolpaqui ama. Xijchihua noch cati cuali cati moyolo quinequi quichihuas. Xijyeco noch cati onca. Pero xijmati ya ni; ajsis se tonali quema timoquetzas iixpa Toteco para tijmacas cuenta ten noch cati tijchijtoc. <sup>10</sup> Huajca xijhuejcamajc ahua cualanti, tequipacholi huan noch cati amo cuali cati hueli mitzcocos. Masque ama tiitztoc titelpocat quema monemilis eltoc tahuel yejyectzi, ni tonali amo huejcahuas huan tiquitas para ni xihuit nojquiya panos quej amo teno eliyaya.

## 12

<sup>1</sup> Xiquelnamiqui Toteco cati mitzchijchijqui quema noja tiitztoc titelpocat. Xijhueyitepanita amantzi quema tiitztoc titelpocat huan ayemo huala nopa tonali quema ayecmo tijpiyas paquilisti para tiitztos. <sup>2</sup> Pampa teipa ayecmo huelis titachiyas cuali huan tiquinitas tonati, metzti huan sitalime quej ya tzintayohuilihque. Huan masque ya tanqui taquiyahui, motalnamiquilis mocahuas quej

tamixtentoc. <sup>3</sup> Hualas tonali quema nopa huehuejyot mitzchihuas tihuihuipicas huan mometzhua cati quipixque miyac chicahualisti, ayecmo quipiryase. Ayecmo tijpiyas nochimotancoch para tijcuajcuas cuali huan elis quej titachiya ipan ventanas cati soquiyo. <sup>4</sup> Huan quema ya tiquinpolojoitos motancochhua, monequis timotentetzopas chicahuac para huelis tijchichicuetzas motacualis. Teipa ajsis tonali quema timijquehuas cualca quema ayemo tzajtzij cuapeleme pampa amo huelis ticochis. Pero ta ayecmo titacaquis cuali huan mocamanal ayecmo caquistis cuali. <sup>5</sup> Teipa ta tiquimacasis titejcos campa tahuejcapa huan tiquimacasis tihuettis quema tinejnemis. Tieli se huehuentzi tzonchipahuac. Huan tihuahuatatzas motacayo. Ayecmo tijnequis tipaquis ihuaya mosihua. Tiitztos nechca miquilisti. Quena, timquis huan tiyas ipan cati elis mochaj para nochipa. Huan nopa masehualme cati mitzchoquilise itztose ipan calle.

<sup>6</sup> Xiquelnamiqui Toteco ama quema titelpocat huan noja titetic. Xijtequipano ama quema motzontereo noja quinahuatia moyolo ma huitoni huan moeso noja nemi ipan motacayo. Amo xijchiya hasta ayecmo huelis titaijyotilanás huan motalnamiquilis ayecmo teno quimatis. <sup>7</sup> Xijchihua ama quema motacayo ayemo mocuepa taltepochi quej achtohui eltoya huan motonal ayemo mocuepa ica Toteco cati quihualtitanqui.

<sup>8</sup> “Nochi san tapic huan amo teno ipati.” Quej nopa niquijtohua na cati ni Tamachtijquet. ¡Quena,

nochi san tapic!

*Cati más monequi tijchihuase*

<sup>9</sup> Huan na cati niTamachtijquet nielqui tahuel nitalnamiqui huan nojquiya nijsenhuiquili niquinmachti masehualme nochí cati njimatiyaya. Nojquiya niquijcuilo miyac camanali cati inintoca proverbios. <sup>10</sup> Huan niTamachtijquet njitemo camanali cati yejyectzi para ica nitamachtis. Huan nojquiya niquijcuilohuayaya camanali cati senquisa melahuac.

<sup>11</sup> Icamanal se talnamijca tacat quinfuerzajhuía sequinoc ma quichihuaca cati cuali. Quinnextilía sequinoc nopa tamanti cati achi más ipati. Icamanal se talnamijca tacat teyacana ipan se cuali ojti quej se tamocuitahuijquet quichihua.

<sup>12</sup> Pero ta tinocone, nimitzilhuía amo quema tamis masehualme para quiijcuilose más amatapohuali. Huan cati momachtía miyac mosiyahuiltía miyac.

<sup>13</sup> Ten nochí camanali cati niquijtojtoc huan cati anquicactoque, ya ni cati más ipati para nimitzilhuis: “Xiquimacasi Toteco huan xijchihua cati quiijtohua itanahuatilhua. San ya nopa cati monequi quichihuase nochí masehualme. <sup>14</sup> Pampa Toteco Dios techtajtolsencahuas por nochí cati tijchihuaj, masque tijchihuaj tanemijya o ixtacatzi, huan masque cuali o amo cuali.”

**Icamanal toteco; Santa Biblia  
Bible without Deuterocanon in Nahuatl, Huasteca  
Central (MX:nch:Nahuatl, Huasteca Central )**

copyright © 2005 Wycliffe Bible Translators, Inc.

Language: Nahuatl, Huasteca Central

Translation by: Wycliffe Bible Translators, Inc.

**Copyright Information**

© 2005, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The Bible without Deuterocanon**

in Nahuatl, Central Huasteca

© 2005, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

c565d9f9-d202-544b-b78a-3c93df26508e